

**VENDIM**  
**Nr. 866, datë 29.12.2021**

**PËR AUTORIZIMIN E MINISTRISË SË INFRASTRUKTURËS DHE ENERGJISË**  
**PËR TË VIJUAR PROCEDURËN E NEGOCIMIT TË KONTRATËS SË RE, ME**  
**SHOQËRITË “GENER 2” SHPK DHE “G2 INFRA” SHPK**

Në mbështetje të nenit 100 të Kushtetutës, të neneve 26, pika 9, dhe 41, të ligjit nr. 125/2013, “Për koncesionet dhe partneritetin publik privat”, të ndryshuar, dhe të pikës 1, të nenit 17, të ligjit nr. 50/2019, “Për disa ndryshime dhe shtesa në ligjin nr. 125/2013, “Për koncesionet dhe partneritetin publik privat”, të ndryshuar, me propozimin e ministrit të Infrastrukturës dhe Energjisë, Këshilli i Ministrave

**VENDOSI:**

1. Autorizimin e Ministrisë së Infrastrukturës dhe Energjisë të vijoje procedurën e negociimit të kontratës të koncesionit/partneritetit publik privat me shoqëritë “Gener 2” sh.p.k. dhe “G2 Infra” sh.p.k., me qëllim ekzekutimin e vendimit nr. 424 (86-2021-523), datë 29.7.2021, të Gjykatës Administrative të Apelit Tiranë dhe, në rast se është e nevojshme, negociimin e angazhimeve detyruese në emër të shtetit, për realizimin e projektit infrastrukturor të aksit “Thumanë-Fushë-Krujë-Vorë-Kashar”, sipas marrëveshjes së zgjidhjes, bashkëlidhur këtij vendimi.

2. Me hyrjen në fuqi të këtij vendimi, Ministria e Infrastrukturës dhe Energjisë vijon procedurat për dërgimin e studimit të ri të fizibilitetit për mendim dhe shqyrtim pranë Ministrisë së Financave dhe Ekonomisë.

3. Kontrata e re e koncesionit/partneritetit publik privat, si dhe çdo angazhim detyrues në emër të shtetit, pas nënshkrimit nga palët, dërgohet për miratim në Këshillin e Ministrave.

4. Ngarkohet Ministria e Infrastrukturës dhe Energjisë për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

**KRYEMINISTËR**  
**Edi Rama**

7284/8  
24. 12. 2021



**MINISTRIA E INFRASTRUKTURËS DHE ENERGJISË**

**dhe**

**“GENER 2” sh.p.k.**

**dhe**

**“G2 INFRA” sh.p.k.**

**MARRËVESHJE PËR ZGJIDHJEN E KONFLIKTIT  
MBI KONTRATËN E KONCESIONIT**

**Për  
Projektimin, Ndërtimin, Operimin dhe Mirëmbajtjen e Rrugës**

**THUMANË – VORË – KASHAR**

**Datë 24 Dhjetor 2021**



**MARRËVESHJE PER ZGJIDHJEN E KONFLIKTIT MBI ZBATIMIN E KONTRATËS PËR DHËNIEN ME KONÇESION PËR PROJEKTIMIN, NDËRTIMIN, OPERIMIN DHE MIRËMBAJTJEN E RRUGËS THUMANË - VORË - KASHAR**

PALËT:

1. Republika e Shqipërisë e përfaqësuar nga Ministria e Infrastrukturës dhe Energjisë si ministria përgjegjëse për infrastrukturën (në vijim **“Autoriteti Kontraktor”**), përfaqësuar me autorizim nga Zëvendës Ministër Z. Ilir Bejta, dhe
2. GENER 2 sh.p.k., shoqëri e themeluar sipas Ligjit, me seli në Mamuras, Lezhë, Shqipëri, dhe adresë kryesore në: Rruga “Papa Gjon Pali II”, ABA Business Center, kati i 7-të Tiranë, Kodi postar 1000, Shqipëri, me NUIS K58615301M, (në vijim **“GENER 2 sh.p.k.”**), përfaqësuar nga administratori i saj z. Bashkim Ulaj, mbajtës i Letërnjoftimit Nr. G30315336U; si dhe
3. G2 INFRA sh.p.k., shoqëri e themeluar sipas Ligjit, me seli dhe adresë në: Rruga “Papa Gjon Pali II”, ABA Business Center, kati i 7-të Tiranë, Kodi postar 1000, Shqipëri, me NUIS L81926005L (në vijim **“G2 INFRA sh.p.k.”**), përfaqësuar nga administratori i saj z. Gëzim Pani, mbajtës i Letërnjoftimit Nr. H80822036L;

Autoriteti Kontraktor, GENER 2 sh.p.k. dhe G2 INFRA sh.p.k. do të referohen në këtë Marrëveshje secili si **“Pala”** dhe së bashku **“Palët”**, sipas varianteve të tyre gjuhësore në njëjës ose në shumës, siç mund ta kërkojë herë pas here konteksti i kësaj Marrëveshje.

**PËRSHKRIMI PARAPRAK**

**Duke pasur parasysh qe:**

Në bazë të Vendimit të Këshillit të Ministrave nr. 634, datë 1 Tetor 2014 “Për përcaktimin e rregullave për vlerësimin dhe dhënie me koncesion të punëve publike dhe shërbimeve për ndërtimin, operimin, mirëmbajtjen dhe rehabilitimin e rrugëve nacionale” dhe Dokumentacionit të Procedurës Konkurruese, të datës 18.04. 2018, Autoriteti Kontraktor ftoi ofertuesit për të paraqitur ofertat e tyre për projektimin, ndërtimin, dhe mirëmbajtjen e Rrugës Thumanë - Vorë - Kashar, (në vijim **“Rruga”**).

Në përfundim të veprimeve procedurale, Autoriteti Kontraktor përzgjedhi GENER 2 sh.p.k., si ofertuesi më i mirë, i cili do të realizojë projektin e Rrugës sipas kushteve të kontratës koncesionare.

Autoriteti Kontraktor, GENER 2 sh.p.k. dhe G2 INFRA sh.p.k. kanë lidhur perpara Noterit Publik Kontratën Koncesionare “Për Dhënie me Koncesion për Projektimin, Ndërtimin, Operimin dhe Mirëmbajtjen e Rrugës Thumanë - Vorë – Kashar” Nr. 222 Rep. dhe Nr. 1151 Kol., datë 19.10.2018 (në vijim **“Kontrata Koncesionare”**).

Vkm nr. 634, datë 1 Tetor 2014, përcakonte qe kontrata e koncesionit miratohet me

Vendim Këshilli Ministrave.

Autoriteti Kontraktor me anë të Urdhrit Nr. 42, datë 25.01.2019 ka urdhëruar ndërprerjen e procedurës për dhënien e koncesionit/PPP për Projektin e Rugës Thumanë - Vorë – Kashar”.

Urdhri nr. 42, datë 25.01.2019 është ankimuar në Gjykatë, nga GENER 2 sh.p.k. dhe G2 INFRA sh.p.k., dhe në përfundim të gjykimit, Gjykata Administrative e Apelit ka vendosur ndryshimin e Vendimit Nr. 4122 (80-2019-4198), datë 05.12.2019, të Gjykatës Administrative të Shkallës së Pare Tiranë, pranimin e padisë duke shfuqizuar Urdhrin Nr. 42, datë 25.01.2019 të Ministrisë së Infrastrukturës dhe Energjisë “Për ndërprerjen e procedurës për dhënien e koncesionit/PPP për Projektin e Rugës Thumanë - Vorë – Kashar” dhe duke detyruar Ministrinë e Infrastrukturës dhe Energjisë të vijojë veprimet administrative, për t’i përcjellë Këshillit të Ministrave për miratim draft kontratën e koncesionit/ partneritetit publik privat “Për Dhënien me Koncesion për Projektimin, Ndërtimin, Operimin dhe Mirëmbajtjen e Rugës Thumanë - Vorë – Kashar”.

GENER 2 sh.p.k. dhe G2 INFRA sh.p.k. nëpërmjet Shërbimit Përmbarimor kanë kanë vënë në ekzekutim titullin ekzekutiv: Vendimin nr. 424 (86-2021-523), datë 29.07.2021 të Gjykatës Administrative të Apelit Tiranë.

Në kuadër të ekzekutimit të vendimit të përmendur më sipër, Ministria e Infrastrukturës dhe Energjisë ka informuar GENER 2 sh.p.k. dhe G2 INFRA sh.p.k., se *“në programin Afatmesëm ( PBA ) 2021-2023 dhe PBA 2022-2024 nuk ka fonde të planifikuara për këtë kontratë koncesionare.”*.

Për rrjedhojë, GENER 2 sh.p.k. dhe G2 INFRA sh.p.k., kanë shfaqur interesin e tyre me shkresat date 27.10.2021 dhe date 04.11.2021, që të realizojnë kontratën e koncesionit/ partneritetit publik privat “Për Dhënien me Koncesion për Projektimin, Ndërtimin, Operimin dhe Mirëmbajtjen e Rugës Thumanë - Vorë – Kashar”, me fondet e tyre financiare, ne bazë të një studimi fizibiliteti që mund të ishte i pranueshëm për Autoritetin Kontraktor.


Ministri i Infrastrukturës dhe Energjisë, me Urdhrin nr. 428 datë 18.11.2021 ka ngritur grupin e punës.

Autoriteti Kontraktor dhe GENER 2 sh.p.k. dhe G2 INFRA sh.p.k. kanë realizuar disa takime mbi situatën e krijuar dhe mekanizmat e mundshëm për të zgjidhur mosmarrëveshjen në një mënyrë të kënaqshme për palët.

GENER 2 sh.p.k. ka paraqitur një studim të ri fizibiliteti, që parashikon një mundësi për ndërtimin e kësaj Ruge me fondet e saj, pa mbështetje direkte buxhetore (në vijim **“Studimi i Fizibilitetit”**).

Autoriteti Kontraktor vlerëson se Studimi i Fizibilitetit paraqet interes, në kushtet kur nuk kërkon mbështetje buxhetore dhe përbën një mundësi të arsyeshme për zgjidhjen e konfliktit mbi zbatimin e Kontratës “Për Dhënien me Koncesion për Projektimin, Ndërtimin, Operimin dhe Mirëmbajtjen e Rugës Thumanë - Vorë – Kashar”.

**Për këto arsye, Në frymën e kushteve paraprake, Palët bien dakort si më poshtë:**



## **Neni 1                    Objekti i Marrëveshjes**

Me nënshkrimin e kësaj Marrëveshje, Palët bien dakort që të zgjidhin konfliktin mbi zbatimin e Kontratës “Për Dhënien me Koncesion të Projektimit, Ndërtimit, Operimit dhe Mirëmbajtjes së Rrugës Thumanë - Vorë – Kashar.”, ndërmjet Autoritetit Kontraktor dhe GENER 2 sh.p.k. dhe G2 INFRA sh.p.k.

## **Neni 2                    Negocimi i Kontratës së Koncesionit**

1. Autoriteti Kontraktor, dhe GENER 2 sh.p.k. dhe G2 INFRA sh.p.k. do të negociojnë ndryshimet e nevojshme në Kontratën e koncesionit/ partneritetit publik privat “Për Dhënien me Koncesion për Projektimin, Ndërtimin, Operimin dhe Mirëmbajtjen e Rrugës Thumanë - Vorë – Kashar”, duke iu referuar Studimit të Fizibilitetit të propozuar nga GENER 2 sh.p.k. dhe kushteve të kësaj Marrëveshje.
2. Palët bien dakord që ky Studim Fizibiliteti do konsiderohet përfundimtar në momentin e miratimit të tij nga Ministria e Financave dhe Ekonomisë.
3. Palët do negociojnë në mirëbesim kontratën e re të koncesionit, duke marrë për bazën kuadrin ligjor të koncesioneve, Studimin e Fizibilitetit, këtë Marrëveshje dhe cdo akt tjetër ligjor në fuqi.

## **Neni 3                    Hyrja në Fuqi**

1. Pas nënshkrimit të saj nga Palët, kjo Marrëveshje hyn në fuqi me miratimin e saj nga Këshilli i Ministrave i Republikës së Shqipërisë (në vijim “Data e Hyrjes në Fuqi”).
2. Palët pranojnë se kjo Marrëveshje nuk ka asnjë efekt juridik për Palët, në rast mos miratimi të kësaj Marrëveshje nga Këshilli i Ministrave dhe / apo, mos dhënies të pëlqimit nga ana e Ministrisë së Financave dhe Ekonomisë dhe/apo Ministrisë së Drejtësisë.

## **Neni 4                    Heqja dorë nga pretendimet**

1. GENER 2 sh.p.k. dhe G2 INFRA sh.p.k. deklarojnë se në rast nënshkrimi dhe miratimi të kontratës së re të koncesionit nga Këshilli i Ministrave, heqin dorë nga cdo pretendim për zbatimin e Vendimit të Gjykatës së Apelit, apo pretendim tjetër për konfliktin e zbatimit të Kontratës “Për Dhënien me Koncesion të Projektimit, Ndërtimit, Operimit dhe Mirëmbajtjes së Rrugës Thumanë - Vorë – Kashar.”.
2. Ministria e Infrastrukturës dhe Energjisë deklaron se në rast të miratimit të kësaj Marrëveshje nga Këshilli i Ministrave dhe nënshkrimit dhe miratimit të kontratës së re të koncesionit, heq dorë nga cdo pretendim në Gjykatë të Lartë për konfliktin e zbatimit të Kontratës “Për Dhënien me Koncesion të Projektimit, Ndërtimit, Operimit dhe Mirëmbajtjes së Rrugës Thumanë - Vorë – Kashar.”.

Kjo Marrëveshje është hartuar në 5 (pesë) kopje të barazvlefshme në gjuhën shqipe me përmbajtje të njëjtë ligjore, dhe u lexua prej palëve, të cilët e kuptuan dhe e pranuan atë, e nënshkruan me vullnet të lire e të plotë.




Në emër të Autoritetit Kontraktor:

**Ministria e Infrastrukturës dhe Energjisë**

Emri: Ilir Bejtja

Zëvendësministër



Data: 24 Dhjetor 2021




Në emër të Koncesionarit:

**“GENER 2” Sh.p.k.**

Emri: Bashkim Ulaj

Administrator



Data: 24 Dhjetor 2021



Në emër të Shoqërisë Koncesionare:

**“G2 INFRA” Sh.p.k**

Emri: Gëzim Pani

Administrator



Data: 24 Dhjetor 2021

